


Utoqqaat illersuisuat

Ukiumoortumik nalunaarut 2021



Ajaappiaq

ILISARITITSINEQ	2
UTOQQAAT ILLERSUISUAT ALLAFFEQARFITTAARTOQ	2
UTOQQAAT ILLERSUISUATA ALLAFFEQARFIANUT MATUERSAATIT TUNNIUNNEQARPUT	2
ALLAFFISSORNERMI SULISUMIK ATORFINITSITSISOQ	3
NITTARTAGALIORNERMUT SULEQATIGIINNISSAMIK ISUMAQATIGIITTUT	3
PUIGUTTORNEQ PILLUGU ATAATSIMEERSUARNEQ	3
ILULISSANI UTOQQAAT PEQATIGIIFFIINIK ATAATSIMEEQATEQARNEQ	4
INUIT PISINNAATITAAFFII PILL. SIUNNERSUIISOQATIGIIVISA ILEQQUUSUMIK INISSITSITERLUTILLU ATAATSIMIINNERANNI PEQATAASOQ	4
KATTUFFIK UTOQQAAT NIPAATA ATAATSIMEERSUARNERANI ALAATSINAATTUTUT PEQATAASOQ	5
INNUTTAASUT SAAFFIGINNISSUTAAT	6
UTOQQAAT ILLERSUISUATA AQQA ILISARNAATAALU	6
ILANNGUSSAQ 1: TUSAGASSIORFINNUT NALUNAARUT SIULLEQ	7
ILANNGUSSAQ 2: INNUSSAASUMIT SAAFFIGINNISSUTIP SULIARINEQARNERA - ASSERSUUT	9

UKIUMOORTUMIK NALUNAARUSIAQ – UTOQQAAT ILLERSUISUAT 01.11.21 - 31.12.21

ILISARITITSINEQ

Inga Egede Utoqqaat Illersuisuattut 2021-mi novembarip aallaqqaataani atorfinitsinneqarpoq, tamatumalu pinissaanut 2021-mi novembarip qiteqqunnerata tungaanut allanik atorfeqartoqarani. Utoqqaat Illersuisuat taavalu Isumaginninnermut, Suliffeqarnermut Nunamullu Namminermut Naalakkersuisoqarfimmi atorfililit Namminersorlutik Oqartussat Nuuk Centerimi allaffeqarfianni 2021-p naanerata tungaanut allaffeqatigiipput.



UTOQQAAT ILLERSUISUAT ALLAFFEQARFITTAARTOQ

Utoqqaat Illersuisuat suliaasani, suleqatitaani, qarasaasarsorneq taavalu isumaginninnermut suliffeqarnermullu naalakkersuisoqarfimmi atorfilinnit qarasaasialerinemik sullinneqarneq pil-

lugit nassuiaanneqarpoq, tamannalu atorfinitsitaanerani piffissami siullermi aamma Utoqqaat Illersuisuata allaffeqarfiata pilersinneqaleruttornerani pivoq.

Utoqqaat Illersuisuat atorfinitsinneqarami isumaginninnermut naalakkersuisoqarfiup pisor-taata, Isak Nielsen Kleistip, allaffeqarfimmik namminersortumik pilersitseqqullugulu allaffissornermi siunnersortitut atorfinittussamik sulisussarsioqquaa, tamannalu Utoqqaat Illersuisuata atorfinitsinneqarnerani sapaatit akunnermi siullermi pivoq.

Utoqqaat Illersuisuata allaffissornermi suleqataa Utoqqaat Illersuisuata allaffeqarfiani suliat nukinginnarlunnartut suliaassallu allat allaffeqarfittaaleruttornermi inaarsarneqarnissaasa tungaannut sulivoq.

UTOQQAAT ILLERSUISUATA ALLAFFEQARFIANUT MATUERSAATIT TUNNIUNNEQARPUT

Utoqqaat Illersuisuata allaffeqarfianut matuersaatit 2021-mi decembarip aallaqqaataani tunniunneqarput. Allattoqarfiup sumiiffia uaniip-poq: Kissaneeqqortuunnguaq 16-003 3900 Nuuk. Matuersaatit tunniunneqarnerat oqalut-tuarisaanermi immikkuullarissutut taasariaqar-poq, tassami Utoqqaat Illersuisuat suliaqarfissa-minik nammineerluni allaffeqarfittaarmat.

Utoqqaat Illersuisuata allaffeqarfittaani tamatu-ma kingorna pisatsersorpaa, teknikkikkut ator-tulersorpaa pequsersorlugulu. Tamanna coro-navirusip nunatsinni juullip ukiortaallu akor-nanni tuniluunna peqqutaalluni naatsorsuu-tiginngisamik kinguar-teqattaartariaqarsimavaa.


Utoqqaat Illersuisuata illuutiteqatigiiffiullu, Net-boligip, Kissaneeqqortuunnguaq 16-003-mik at-tartornermut isumaqatigiissut 2021-mi decem-barip aallaqqaataaniit 2024-mi novembarip ul-luisa 30-ata tungaanut atuuttoq atsiorpaat.



Allaffeqarfik pingasunik initaqarpoq, taakkunannga marluk Utoqqaat Illersuisuata allaffissornermilu suleqatissaata allaffigissavaat.

ALLAFFISSORNERMI SULISUMIK ATORFINITSITSISOQ

Inatsisileritooq, Najattaaq Mathiassen, Utoqqaat Illersuisuata allaffeqarfiani allaffissornermi sulisutut 2021-mi novembarip ulluisa 15-ianniit decembarimi sapaatit akunnerisa aappaata tungaanut atorfeqarpoq.



Najattaaq Mathiassenip naleqquttumik allaffeqarfissarsiorneq, allaffeqarfimmut pequtiniq pi-siortorneq allaffissornermilu suliaassanik allanik Utoqqaat Illersuisuata allaffeqarfianik pilersit-sinermut attuumassutilinnik inaarsaaneq sulias-

saata ilagisimavaat. Aammattaaq Utoqqaat Illersuisuata allaffeqarfiullu allaffissornermi sulisussamik 2022-mi februaarimi atorfinitsitsivinnissaasa tungaannut allaffissornermut inatsisilerinermullu tunngasunik suliaqarpoq.

NITTARTAGALIORNERMUT SULEQATIGIIN- NISSAMIK ISUMAQATIGIITTUT

Nunamedia Designsilu nittartagaliorneq taavalu nittartagalerinermik aqutsineq sullissinerlu pillugit suleqatigiinnissamik isumaqatigiissuteqarput, tamannalu 2021-mi novembarip ulluisa 18-ianni pivoq. Isumaqatigiissutaat Nunamedia Designsip Utoqqaat Illersuisuata allaffeqarfianit iminneqarnermigut nittartakkami paasisstissinerit, nutaarsiassiinerit qaammarsaane-
rilu saqqummiussuunnissaannik suliaasaanut ilaatinneqarput. Arlariinnik oqaasertaligaasussamik nittartagaliorneq 2022-mi qaammatit pingasut tallimallu siulliit ingerlaneranni naammassineqassangatinneqarpoq.

PUIGUTTORNEQ PILLUGU ATAATSIMEERSUARNEQ

Utoqqaat Illersuisuat puiguttorneq pillugu Ilulisani 2021-mi novembarip ulluisa 23-anni 24-anilu ataatsimeersuarnermi peqataavoq, puigortunngorsimasunillu sullissinermut tunngasunik suliallit utoqqaat illuanneersut taavalu isumaginninnermut naalakkersuisoqarfimmi peqqinnissamullu naalakkersuisoqarfimmi atorfillit aamma ataatsimeersuaqataapput.



Assi: Isumaginninnermut, Suliffeqarnermut Nunamullu Namminermut Naalakkersuisoqarfik.

Utoqqaat Illersuisuata puigortunngorsimasunik sullissinermut tunngasunik suliallit kommunerisaminni najukkaminnilu suliatigut akissusaaffimminni ajornartorsiutaat paasisaqarfiginerummagit puiguttorneq pillugu ataatsimeersuaqataanini pissarsiaqarfigilluarpaa. Utoqqaat Illersuisuata puigortunngorsimasut, taakkununga qanigisaasut sulisullu puigortunngorsimasunik sullissinermut tunngasunik suliallit illoqarfinnilu nunaqarfinnilu utoqqaat illuini ataasiakkaani atugaat kipiluttunartut ataatsimeersuarnermi peqataareernermini misissoqqissaarpai. Taakkulu atugaannik kipiluttunartunik qaammatialunni misissueqqissaarneq naammanngimmat, Utoqqaat Illersuisuata misissueqqissaarnini 2022-mi nangissavaa.

ILULISSANI UTOQQAAT PEQATIGIIFFIINIK ATAATSIMEEQATEQARNEQ

Utoqqaat Illersuisuata puiguttorneq pillugu Ilulissani ataatsimeersuarnermi peqataanermi ataatillugu Ilulissani utoqqaat peqatigiiffiit marluk ataatsimeeqatigai, tamatumani iliminut ilisaritippoq utoqqaallu peqatigiiffii "Uasukkut" aamma "Makisequt" suliatik pillugit saqqummiillutik. Ilulissani utoqqaat peqatigiiffiini ilaasortat ataasiakkaat ajornartorsiutit inuunermilu atukkatik kipiluttunartut Utoqqaat Illersuisuannik ataatsimeeqateqarnerminni saqqummiuppaat.



Utoqqaat Illersuisuata Ilulissani utoqqaat peqatigiiffiit tunngatillugu akissusaaffigisani atuuffimminullu tunngatillugu inatsisini tunngavissani pillugit aamma saqqummiivoq, takuuk Utoqqaat illersuisuat pillugu Inatsisartut inatsisaat nr. 37, 28. november 2019-imeersoq.

INUIT PISINNAATITAFFII PILL. SIUNNERSUISOQATIGIIVISA ILEQQUUSUMIK INISSITSITERLUTILLU ATAATSIMIINNERANNI PEQATAASOQ

Utoqqaat Illersuisuat Inuit Pisinnaatitaaffii pillugit Siunnersuisoqatigiivisa ileqquusumik inissitsiterluttillu 2021-mi novembarip ulluisa 26-anni ataatsimiinneranni alaatsinaattutut peqataavoq. Inuit Pisinnaatitaaffii pillugit Siunnersuisoqatigiit ilaasortassanik kingusinnerusukkut inissitsiterneqartussanik ataatsimiinnermi ilaatiqut qinersisoqarpoq. Utoqqaat Illersuisuat Inuit Pisinnaatitaaffii pillugit Siunnersuisoqatigiivisa ataatsimiinneranni alaatsinaattuusartoq taasinnaatitaasanngilaq, atuuffinili tunngavigalugu suliani suliasaqarfinilu pillugit saqqummisarluni.

KATTUFFIK UTOQQAAT NIPAATA ATAAT-SIMEERSUARNERANI ALAATSINAATTUTUT PEQATAASOQ

Utoqqaat Illersuisuat taassumalu allaffissornermi siunnersortigalugu suleqataa, Najattaaq Mathiassen, Kattuffik Utoqqaat Nipaata Kangerlusuarmi decembarip ulluisa tallimaanniit decembarip ulluisa arfineqaappaat ilanngullugu ataatsimeersuarnerani alaatsinaattutut peqataapput. Qaanaami Nanortalimmilu utoqqaat peqatigiiffiinit aallartitat aamma ataatsimeersuaqataapput.



Utoqqaat Illersuisuat atuuffimminut tunngatilugu inatsisinik tunngavigisaminik ataatsimeersuarneq sioqqullugu ataatsimeersuarnerullu kingorna saqqummiivoq, aamma sulinermini anguniakkani taavalu nunatsinni utoqqarnik siunnersuariaasissani ilitersuariaasissanilu pillugit saqqummiivoq.

Aamma Utoqqaat Illersuisuata Kattuffik Utoqqaat Nipaanneersut suliniutit qulaajaavigineqartariaqartut suliniutigisariaqakkanilu pillugit ataatsimeersuortoqareernerani isumasioqatigai.



Kattuffik Utoqqaat Nipaata suliniutit qulaajaavigineqartariaqartutut aamma Utoqqaat Illersuisuata naammassisariaqagaatut isigisaat aqqaneq-marlunnit ikinnerunngillat. Taakkulu ilaatigut makkuupput: (*Takuuk ilanngussa* 1: Tusa-gassiorfinnut nalunaarut 10.12.21-meersoq)

- Nunatsinni inuit puigortunngorsimasut inuunermi atugaat qanoq ippat?
- Utoqqaat namminneq inigisaminni najugallit attartornermut akiliutaat nalimmassarneqartariaqarput.
- Kommunini ataasiakkaani utoqqarnik sullis-situt najukkaminni utoqqaat peqatigiiffiinit peqataanerusariaqarput, il.il.

Kattuffik Utoqqaat Nipaata ataatsimeersuarnermi nutaanik siulersuisuuneqalerpoq.



Assimi: Utoqqaat Nipaata siulersuisuinit qinigaasut dec. 2021-imi ataatsimeersuarnermi.

Isumaginninnermut suliffeqarnermullu naalakkersuisoq, Mimi Karlsen, Kattuffik Utoqqaat Nipaata ataatsimeersuarnerani oqalugiartunut ilaavoq.

Mimi Karlsen politikkikkut pilersaarutiniq saqqummiivoq, naalakkersuisullu utoqqarnut periusissiasaat pillugu ilaatigut oqaaseqarluni.

Kisitsisitigut paasissutissanik nunatsinni utoqqaat ulluni makkunani amerliartornerannut tunngasunik aamma saqqummiivoq, tamannalu nunatta eqqumaffigisariaqaraa oqaatigalugu.




Assimi: Naalakkersuisoq Mimi Karlsen Utoqqaat nipaata ataatsimeersuarnerani oqalugiartoq

INNUTTAASUT SAAFFIGINNISSUTAAT

Innuttaasut saaffiginnissutaat Utoqqaat Illersuisuannut 2021-mi novembarip aallaqqaataata decembarillu ulluisa 31-ata akornanni tallimat missiliorpaat. (*Takuuk ilanngussaq 2: Innuttaasumit saaffiginnissut*)

UTOQQAAT ILLERSUISUATA AQQA ILISARNAATAALU

Utoqqaat Illersuisuata atissaanik ilisarnaatissaanillu 2020-mi unammisitsisoqarpoq, Sten Lundillu siunnersuutaa 2020-mi oktobarip ulluisa arfernanni taamanikkut utoqqaat illersuisorisaa-nit, Helene Heilmannimit, akuerineqarluni.



Utoqqaat Illersuisuannut atiliunneqarsimasoq "Ajaappiaq" atorunnaarluni ilisarnaatigitinneqartorli atuutiinnassasoq, Utoqqaat Illersuisuattut atorfinitsinneqaqqammertup Inga Egedepaalajangerpaa.



Suliffeqarfik Utoqqaat Illersuisuata Allattoqarfianik ateqassooq.

ILANNGUSSAQ 1: TUSAGASSIORFINNUT NALUNAARUT SIULLEQ

Nuuk ulloq: 10.12.2021

Utoqqaat Illersuisuata suliaassani aallartippai

2021-imi decemberip ulluisa 5- niit 7- at ilanngullugu Kattuffik Utoqqaat Nipaat Kangerlussuarmi ataatsimeersuarnerani Utoqqaat Illersuisuat alaatsinaattutut peqataavoq.

Kattuffik Utoqqaat Nipaat sineriammi utoqqaat peqatigiiffiinit aallartitanik peqataaffigineqarluni ingerlanneqarnerani Utoqqaat Illersuisuata utoqqaat atugarisaat pillugit suliniutit suut qulaajaavigineqartariaqarnersut pillugit kattuffimmi ilaasortat 7. December 2021 isumasioqatigai.

Kattuffiup ilaasortaasa qulequttat ulluinnarni atukkaminnut tunngasut arlaqaqisut pitsanngorsaavigineqartariaqartut Utoqqaat Illersuisuannut apuuppaat.

Ukulu suliakkiutaat pingaarnerit saqqummiutissavakka:

- Ilaatigut Kattuffiup ataatsimeersuartarnerisa, pikkorissaasarnerisa angalatitsisarnerisalu Inatsisartut aningaasanut inatsisaat aqputigalugu aningaasalersorneqartalernissaa kissaatigaat. Utoqqanngoreerlutimmi Tips aamma Lottomut iluanaarutinut qinnuteqaqattaarnerit pisariusinnaasut nukissaalatsiffigisinnaasaramikkit.
- Suliniutigineqartussatut pingaarutilittut eqqaaneqartut ilagaattaaq puigortunngortut napparsimalerneranni siusissukkut nappaammik suussusersiuilluni misissuisarneq pitsaanerusoq. Aamma sineriammi peqqinnissaqarfinni kommuninilu tamani inunnik isumaginnittoqarfinni puigortunngortunik sullissineq pitsaanerusoq assigiinnerusorlu ataatsimeersuarnermi peqataasunit kissaatigineqarportaaq.
- Aamma ataatsimeersuaqataasunit kissaatigineqarpoq kommunini utoqqarnik sullissisut utoqqaat peqatigiiffimminni ataatsimoornerini, ataatsiminnerniusinnaavoq aammattaaq utoqqaat ornittakkaniinneranni akuunerunissaat, tassanimi inuuniarnermikkut atukkamikkut oqariartuutissatik aamma kommunimi sullissisuminnut apuussinnaagamikkit.
- Ataatsimeersuarnermi oqariartuutigineqarportaaq utoqqaliartornermi timip peqqissuunissaa pingaaruteqarmat, kalaalimerngit akimikkut utoqqarnut naleqqunnerusut utoqqarnut atuutsinneqartariaqalersut. Tamannalu anguniarlugu atuisunut ataatsimiitsitaliaqarneq pilerseqqineqartariaqartoq kissaatigineqarpoq, utoqqaallu siunnersuisoqatigiivinit pilersinneqarsimasunit suleqateqarnikkut akit qaffasippallaartut isumaqatigiinniutigineqartariaqalernerat naqissusiilutik oqariartuutigaat.
- Aammalu utoqqaat pisinnaanerusut ineqarfiini aningaasartuutit assigiinnerusut anguniarneqartariaqartutut oqariartuutigineqarpoq. Inoqarfinnilu assigiinngitsuni utoqqaat illuini inissaaleqineq aamma iluarsivigineqartariaqartutut oqariartuutigineqarportaaq, utoqqaat namminneq illuminniittut imminnut isumassorsinnaajunnaartut ikiortissaaruttarmata ilaallu angerlarsimafeeruttarlutik.

Kattuffiup Utoqqaat Nipaata ataatsimeersuarnerani pissutsit utoqqaat inuuniarnermikkut atugarliutaat qulequttat arlaqaqisut pitsanngorsaavigineqartariaqartutut oqaatigineqarlutik uannut apuunneqarput.

Uanga Utoqqaat Illersuisuatut pisussaaffigaara suliassaralugulu kattuffimmi ilaasortat ataatsimeersuarnerminni suliakkiissutigisaat qulaajaavigissallugit aamma akissussaasunut, soorlu Inatsisartunut Naalakkersuisunut, kommuuninut, peqqinnissaqarfimmut kiisalu Inuit Pisinnaatitaaffii pillugit Siunnersuisoqatigiivinut apuussissallunga.

Suliakkiissutigineqartut tamaasa qulaajaavigissavakka, kisianni suliassanik tulleriiaarisariaqarama assersuutigalugu sineriammi illoqarfinni mikinerusuni utoqqaat illuini tarnimikkut innarluutillit, puigortunngornermik nappaatillit aamma utoqqaat ataatsimoortillugit ineqartinneqarnerat pillugu paasiniaallunga qulaajaassaanga.

Taamatuttaaq allakkat siornatigut utoqqarnut apuunneqartartut imaluunniit postboxinut aaneqarsinnaasartut maanna qarasaasiatigut


nassiunneqartalerneris qanoq utoqqarnut eqquinerlunnersoq paasiniaaffigeqqaarniarpara, taama oqarpoq Utoqqaat Illersuisuat Inga Egede, nangipporlu:

“Kattuffik Utoqqaat Nipaata ilaasortaasa naapinnerani qulequttat qulaajaavigisariaqartutut oqaatigineqartut tamaasa pingaaruteqartutut nalilerpakka, aamma Utoqqaat Illersuisutut sulilerninni pingaartilluinnarlugit ingerlatissavakka. Suliakkiissutigineqartut suliarinerini Kattuffik Utoqqaat Nipaanni siulersuisut suleqatiginissaat qilanaaraara.”

Kattuffik Utoqqaat Nipaata Kangerlussuarmi ataatsimeersuarneranni aallartitatut peqataasut 19-it aamma sineriammi peqatigiiffinni ilaasortat alaatsinaattutut ataatsimeersuarnermi peqataasut arfinillit ataatsimeersuareernerup kingorna qarasaasialerineq sammillugu pikkorissartinneqarput.

Inussiarnersumik inuulluaqqusillunga / Venlig hilsen

Inga Egede



Utoqqaat Illersuisuat/Ældretalsmand

NASSUIAAT 1

Ataani allaqqasut innuttaasut Utoqqaat Illersuisuannut 2021-mi novembarip aallaqqaataata decembarillu ulluisa 31-ata akornanni saaffiginnissutaasa ilaannut tunngapput

Nassuiaat 1 innuttaasut saaffiginnissutaannut tunngatillugu piffissami sivisuumi qasseeriarluni siunnersuisoqarsinnaasarnernanik ersersitsivoq.

Upernavimmi angummut 66-inik ukiulimmut paniusoq Utoqqaat Illersuisuannut oqarasuaatikkut 2021-mi novembarip qiteqqunnerani saaffiginnippoq. Angutip 66-inik ukiullip nulia SIK-p akissarsiaritittagaannik minnerpaanik akissarsiaqarluni sulisarpoq.

Ima pisoqarpoq:

Angut 66-inik ukiulik seeqqumigut illuttut gigteqarnini pissutigalugu 2021-mi maajimili napparsimalluni sulinngiffeqalerpoq. Sivikitsumik napparsimalluni siusinnerusukkut sulinngiffeqartareersimavoq, Upernavimmili peqqissaavimmi nakorsaq, angut taanna 66-inik ukiulik seeqqumigut illuttut gigteqarmat, siusinaartumik soraarnerussutisiaqalernissaa / pensionisiaqalernissaa innersuussutigalugu Avannaata Kommunanut allagaqarpoq. Angut taanna 66-inik ukiulik siusinaartumik pensionisiat pillugit Inatsisartut inatsisaat nr. 40, 9. december 2015-imeersumi § 8, tak. § 5 tunngavigalugu siusinaartumik pensionisiaqalerumalluni kommunimut 2021-mi aggustimi qinnuteqarpoq.

Angut taanna Suliffeerunnermi ikiorsiissutit pillugit inatsisartut inatsisaat nr. 2, 15. maj 2014-imeersumi § 5, tak. § 6 imm. 1 nr. 3 naapertorlugu 2021-mi maajimiit aggusti ilanngullugu suliffeerunnermi ikiorsiissutisisarpoq.

Piffissap ingerlanerani seeqqulunnerulernini peqqutigalugu pitsorlussiartuinnarami pisuppiarsinnaajunnaarpoq. Taamaammat pisuummik / rollatorimik peqqissaavimmit neqeroorfigineqarpoq. Kommuni pisuutinut qularnaveeqqusiissutitut siumut akiligassanut ikiorsiinissamut itigartitsisimammat, angutip taassuma pania pisuutinut qulanaveeqqutitut siumut akiliivoq. Kommunilu angutip taassuma pisuutai siulliit aserormata nutaanik pisuutitaarnissaanut aatsaat tapiissuteqarpoq.

Angut taanna 66-inik ukiulik siusinaartumik pensionisiaqalernissamut qinnuteqaatini pillugu kommunimut 2021-mi aggustip novembarillu akornanni qasseerpassuariarluni saaffiginnilluni akissutisi niartarsimavoq. Kommunimi sullissisut ilaata angut taanna allakkatigut akinagu oqaasiinnakkut arlaleriarluni itigartittarsimavaa. Kommunilu angut taanna allatigut ikiorsiissutisilernissaanik aamma neqeroorsimanngilaq. Taamaammat angut taanna nulia ilaqutaasa ikiorlugit angerlarsimafiata kiassarneranut uuliamut qaammaterpaalunni akiliuttarsimavaat angut imminut pilersorsinnaajunnaarsimammat.

Paniat Utoqqaat Illersuisuannut siorna novembarip qaammataani saaffiginnereersorlu, Utoqqaat Illersuisuata ilaqutariit taakku Pisortanit ikiorsiissutit pillugit Inatsisartut peqqussutaat nr. 15, 20. november 2006-imeersumi § 7, imm. nr. 1 tunngavigalugu kommunimut ikiorsiissutininik qinnuteqassasut siunnersorsimavai.

Taamatuttaaq angut taanna siusinaartumik pensionisiaqalernissamut qinnuteqaatini pillugu kommunimit akissutisinissamut nukingisaaruteqarnissaanut siunnersorpaa. Siusinaartumillu pensionisiaqalernissamut qinnuteqaatit sivisuumik suliarineqarsinnaasarmata, Utoqqaat Illersuisuata angum-

mut tassunga aamma erseqqissaatigaa. Angut taanna 2022-mi februaarip ulluisa 24-anni 67-iliisus-saasimammat, 2022-mi marsip aallaqqaataaniit utoqqalinersiaqalernissamut qinnuteqassasoq aamma siunnersorpaa.

Angut taanna 66-inik ukiulik ullut 14-ikkaartumik 800 koruuninik ikiorsiissutisalersimasooq taavalu illup kiassarneranut uuliamut novembarimi decembarimilu aningaasartuutitut Pisortanit ikiorsiis-sutit pillugit Inatsisartut peqqussutaat nr. 15, 20. november 2006-imeersumi § 8, imm. nr. 1 aamma § 13, imm. 2 tunngavigalugit kommunimit ikiorserneqarsimasooq, pania Utoqqaat Illersuisuat decem-barip ulluisa 21-anni saaffigeqqikkamiuk oqarpoq.

Angutaata siusinaartumik pensionisiaqalernissamut qinnuteqaataa januaarimi kiisami akissuteqarfi-gineqarmat itigartinneqarluni, pania Utoqqaat Illersuisuat 2022-mi marsip ulluisa 21-anni saaffigeq-qikkamiuk oqarpoq. Angutaalu siusinaartumik pensionisiaqalerusulluni malartaasernera peqquti-galugu pisinnaatitaanini tunngavigalugu utoqqalinersiaqalernissamut qinnuteqarsimanngitsoq, pa-nia aamma oqarpoq. Angutip taassuma 2022-mi februaarimi 67-iliisusnaanera pissutaalluni siusinaar-tumik pensionisiaqalernissaa qularnarmat utoqqalinersiuteqalernissamut qinnuteqaruni pitsaane-russasoq, Utoqqaat Illersuisuata allaffeqarfianit inuttaanut arlaleriarlugu nassuiaanneqarsimavoq.

Ataatani 2022-mi januaarip aallaqqaataata kingorna ikiorsiissutiseqqinnanilu illup kiassarneranut uuliamut aningaasartuutitut ikiorserneqaqqissimanngimmat Isumaginninnermi naammagittaal-liuteqarfimmuut aamma Inatsisartut Ombudsmandiannut allagaqarsimalluni, pania aamma oqar-poq. Pania ulloq taanna, tassa 2022-mi marsip ulluisa 21-anni, allagaqareersorlu, angutaa kommuni-mit attavigineqarluni ataatsimeeqatiserineqarsimavoq.

Paniata ulloq taanna kingusinnerusumi sianeqqilluni ilisimatitsissutigaa, kommunimi sulisut marluk angutaata qinnuteqaataanik suliarinninnerminni kukkuluttorsimammata angutaata sulisut taakku ataatsimeeqatigiumasimanngikkai, issuaaneq aallartippoq: "atorfillit kommunimi taakkuupput su-liakkiutigisanni kukkullutik suliaqartut" oqaloqatigiumasimanngikkaalu tamanna pillugu.

Angut taanna pisinnaatitaanini naapertorlugu utoqqalinersiuteqalernissamut ikiorserneqarnis-samullu kommunimukarluni qinnuteqariartortariaqartoq, attavigeqqinnerani erseqqissumik nas-suiaapparput.

Angut taanna 2022-mi marsip aallaqqaataaniit kingumut atuutilersumik utoqqalinersiuteqalersi-masooq, pania 2022-mi marsip ulluisa 24-anni sianeqqikkami ilisimatitsivoq.